



Fundasaun Mahein (FM), 30 Outobru 2020

Komunikadu Imprensa

Implementasaun Servisu Militar Obrigatoriu iha Timor-Leste

Tuir komunikadu imprensa Governu nian loron 28 Outobru 2020 VIII Governu Konstitusional ne'ebé lidera husi Primeiru-Ministru Taur Matan Ruak aprova Regulamentu foun kona-bá Lei Servisu Militar Obrigatoriu. Razaun hodi introdus Servisu Militar Obrigatoriu maka hodi responde ba nesesidade F-FDTL nian no polítika VIII Governu Konstitusional.

Temi kona-bá implementasaun Servisu Militar Obrigatoriu iha Timor-Leste, la sees husi Primeiru-Ministru Taur Matan Ruak nia promesa iha kampania eleisaun prezidensial 2012 no parlamentar 2017 no 2018. Iha tinan 2012, bainhira kandidatu Taur Matan Ruak eleitu nu'udar Prezidente Repúblika, hahu dudu programa ne'e no estabelese ekipa ida ne'ebé lidera husi Casa Militar Prezidencia Repúblika nian hodi halo diskusaun. Maibe programa Militar Obrigatoriu la bele implementa tamba la'os kompetênsia Prezidente Repúblika nian no la regula mos iha Lei ruma nomos programa Governu nian.

Iha tinan 2018 Taur Matan Ruak nomea ba Primeiru-Ministru VIII Governu Konstitusional nian introdus keda Servisu Militar Obrigatoriu iha Programa Governu nian área defeza nian. Maske nune'e, programa ne'e la ho estudu ruma ne'ebé prova katak iha duni nesesidade ka lae atu implementa Servisu Militar Obrigatoriu iha Timor-Leste. Husi prespetiva estratéjika kona-bá polítika defeza nasional, iha exersísiu formulasaun polítika defeza Estadu ida nian, ameasa no interese estratéjiku maka determina estrutura forsa defeza nian. Tamba ne'e implementasaun ba programa sira nune'e, la'os bazeia deit mehi no promesa sira.

Nune'e implementasaun Servisu Militar Obrigatoriu iha Timor-Leste sei baralla deit dezenvolvimentu F-FDTL nian no sakrifika mos setor produtivu sira seluk ne'ebé prioridade liu duke Servisu Militar Obrigatoriu. Programa ida ne'e mos sei hatodan deit despeza Estadu nian.

Iha kontestu Timor-Leste, susar tebe-tebes, karik la'os imposível, atu Estadu ne'e bele sustenta estrutura forsa defeza ida ne'ebé mai husi obrigatóriu. Molok atu tara mehi ne'e aas liu, presiza kompriende situasaun atual. Ohin-loron, iha problema barak no oin-oin iha esforsu dezenvolvimentu F-FDTL atu sai forsa ida ne'ebé profesional no konvensional liu-liu problema orsamentu.

Nune'e FM rekomenda:

1. Governu liu husi Ministru Defeza fó prioridade ba revizaun ba Planu Força 2020 hodi estabelese postura forsa defeza ida ne'ebé realistiku no kontestual. Duke Servisu Militar Obrigatoriu ne'ebé halo baralla deit setor defeza nian no hatodan mos despeza Estadu nian;

2. Rekomenda ba Prezidente Repúblika Veta Regulamentu foun ba Servisu Militar Obrigatoriu ne'ebé Governu apresenta. Tamba setor produtivu sira prioridade liu duke Servisu Militar Obrigatoriu ne'ebé la ho estudu ruma no bazeia deit ba promesa polítika sira no mokit iha razaun sira hodi dudu programa ne'e.

Atu hetan informasaun kle'an liu kona-bá asuntu ne'e bele kontaktu:

João Almeida

Acting Director

Email: almeidamahein@gmail.com

Telemove: (+670) 7756 1184 / 7710 3346

Website: www.fundasaunmahein.org